

■ CONVIVENZA

Vus avais las uras ...

DA PIEDER CAMINADA*

Cura ch'ìl Grischun pareva dacurt da sfundrar en las massas da naiv, era jau persvas che la posta vegnia ad arrivar per ina giada blier pli tard ubain insomma betg. Ma durant che jau era vi da badigliar naiv, è cumpari noss postin strusch in'ura pli tard che normalmain. Ed el n'era insomma betg stressà, malgrà che las vias eran miserablas e ch'i na deva pervia dals mirs da naiv auts nagliur ina piazza per parcar l'auto. A mia remartga ch'i na saja betg simpel da reparter la posta tals dis, ha el respundì laconicamain: «Igl è sco ch'igl è.»

Quest um ha senza dubi buna gnerva, pertge che ses job n'è era sut circumstanzas normalas betg simpel. Avant onns essanus, mia consorta ed jau, ina giada sesids sin la terrassa d'ina ustaria da muntogna en l'Engiadina. Inascura è arrivada ina dunna ed ha dumandà, sch'ella possia seser giu davos maisa cun nus. Nus avain cumenzà a discurren ensemen ed ella ans ha raquintà da sia lavur. Ina lavur ch'ella facheva atgnamain anc adina gugent – che n'era per ella dentant betg pli quai ch'ella era stada ina giada. Tut saja daventà uschè hectic, ha ella manegjà. Ins n'haja nagin temp pli e stoppia curren d'ina chascha da brev a l'autra, perquai che tschertas personas intelligentas hajan calculà



tge che correspundia temporalmain (e pia era financialmain) ad ina distribuiziun da la posta optimala.

Sche jau ma regord anc endretg als plets da la postina engiadinaisa, dastgan tut las collavuraturas e tut ils collavuratur da la posta che han da far cun ina brev tegnair enta maun quella maximalmain indesch secundas. Tut ensemen, bainchapi. Pia davent da la spediziun al spurtegl fin la consegna en la chascha da brev dal retschavider. Tar ina brev recumandada èn lubidas tschintg secundas dappi, perquai ch'ìl postin sto anc dumandar ina sutscriziun da la retschavidra u dal retschavider.

Quant malsaun è quai pomai? Tge capita en ils chaus da las personas ch'inventan insatge uschia? E quant productiva è la lavur da tals optimaders che calculeschan cun il cronometer quant temp ch'ìl personal dastga duvrar per spedir ina brev dad A a B?

La posta n'è dal reminent betg l'unica instituziun che proceda tenor quest sistem. Era en il sector da sanadad è quai dera-sà. Jau hai udì d'organizzazioni da spitex che calculeschan cun il cronometer, quant ditg ch'ìl personal dovra per exequir ina «prestaziun da tgira» definida tar ina pazienta u tar in pazient. Natiralmain per spargnar custs. E pover tai, sch'i cuzza in di pli ditg che calculà! Tge beffa, cura ch'ins legia en la gasetta ch'in medi superiur da l'ospital universitar da Turitg duai avair manà ils 22 d'october 2019 a las 14.30 il medem mument nov (!) discurs cun pazientas e pazients e che l'ospital ha lura mess a quint quels senza scrupels. Dal reminent n'è quai nagin cas singul, sco quai che retschertgas da medias han cumprovà.

Vus avais las uras, nus «avain il temp», di ina veglia sabientscha (probablmain indiana). Forsa fasschessi bain da ponderar ina giada en tut ruaus, tge che pudess esser manegjà cun quai.

***Pieder Caminada è mainaproject scolaziun e redactor tar la «Südostschweiz». El è creschi si a Glion en in ambient per gronda part tudestg e viva oz en il vitg rumantsch da Castrisch.**

La convivenza da linguas e culturas en il chantun Grischun – quai è il tema da la Convivenza, che cumpara mingamai glindesdi en La Quotidiana ed en la Südostschweiz.